

PROGRAMMA

*Quo*

RECTOR

UNIVERSITATIS ROSTOCHIENSIS

JOANNES BAC-  
MEISTERUS, D.

Med. & Sup. Math. Prof. P.

*Ad*

FESTUM

SANCTORUM  
ANGELORUM

ritè & religiofè celebrandum,

Omnes & singulos Academiae Cives sedulo  
hortatur & monet.



ROSTOCHII,

Typis JOANNIS KILII, Acad. Typogr. Anno 1671.





ABBATHUM statim à Mundi primordio in memoriam hujus pulcherrimi rerum Universi ab ipso JEHOVA institutum, non solum Patriarchæ devotè, sanctè, piè, celebrarunt: sed & posteris suis seriò mandarunt, ut diem illum sacrum & solennem animis ad devotam pietatem compositis observarent; sacrificiis ritè peragendis dicarent, divino cultui sanctisque operibus consecrarent. Quod si jam respicere volumus animo spatium præteriti temporis, ac prima Festorum initia progressusque recordari: reperiemus certè in super, patefactionum divinarum ordinem in Vet. Testamento sic distributum fuisse, ut ad certos temporum terminos inciderent, quæ res omnium divinissimæ in Ecclesiâ Israeliticâ essent gestæ. Et isthac via ac ratione rerum omnium Moderátor DEUS voluit memoriam maximorum & admirabilissimorum suorum operum conservari in Populo Judaico, ac ad feram propagari posteritatem. Quinimò non sine sapientissimâ ratione per Mosis manum certâ lege expressit & sancivit, quos sibi dies, præter S A B B A T H U M vellet esse sacros, in quibus ex universo Populo suo ad certa loca confluerent, ibidemque insignem & anniversariam beneficiorum ipsius commemorationem, ac celebrationem peragerent, læte agitent. Hinc est, quod tum PASCHA, tum PENTECOSTEN, tum denique *Συννοησιαν* cum quâ EXPIATIONIS Festû cohærebat, ad utrumq; autem Propitiationis scilicet & Tabernaculorû præparatio erat TUBARUM Festum instituit. Et sanè ad PASCHATIS Festum quod attinet, illud disertè à DEO ad XIV diem primi Mensis Judaici fuit alligatum. Præterquàm verò quod PASCHA divinitus institutum erat in recordationem gloriosæ illius liberationis & eductionis ex Ægypto & tyrannide Pharaonis, & piam meditationem reliquorum beneficiorum in gentem Judaicam veriùs effusorum quam collatorum: præfigurabat insuper res sub plenitudine temporis fortiter præclareque gerendas per MESSIAM sive CHRISTUM, qui proprio suo sanguine humanum omne genus ab hostibus spiritualibus, à captivitate ac tyrannide Peccati, Mortis, Diaboli ac Inferni erat liberaturus. PENTECOSTES prætereà Festo Judæi non solum benedictionem DEI in messe perceptam gratis celebrabant animis: Verum etiam recordabantur Legis in Monte Sinai promulgatæ die



die scilicet L. ab exitu gentis Judaicae de Ægypto ad montem usq; illum. Et sane magno studio debitaque reverentiâ à populo Israelitico Festum illud fuisse observatum, vel ipsius gentium Doctoris Pauli exemplum, quando Judæorum Pentecosten Jerosolymis præmissis purgationibus ceremonialibus celebrasse legitur, haud obscure testatur. TABERNACULORUM sive SCENOPEGIORUM Festum celebrabatur à Judæis XV. septimi Mensis die, admonebatque Filios Israel peregrinationum per loca deserta, quod videlicet eis in vasta solitudine absque lare familiari vagantibus fuisset pro domo tabernaculum, pro tecto cœlum, pro lecto solum, pro pane manna, pro vino ex petra saliens aqua. DEI enim summè misericordis cura & plusquam paterna clementia eos annis XL in tectoriis & tabernaculis agentes, ita mirè protexit ac defendit, ut intereâ temporis prorsus nullis morborum aut infirmitatum procellis tentarentur, nec Vestimentorum aut commeatus inopiâ præmerentur: tum etiam significabat veræ Ecclesiæ militantis statum: quippè quæ hoc in Mundo tanquam in deserto seu exilio passim oberet, nec sedem habeat stabilem, sed assiduis votis cœlestem expetat patriam. Cum hoc ipso Festo arctè quasi conjunctum erat PROPITIATIONIS seu EXPIATIONIS Festum, quo summâ solennitate expiata sunt omnia totius Populi peccata & coram Domino facta propitiatio est. Hâc ipsâ autem feriâ significabatur passio Filii DEI in cruce, quando uno sacrificio expiavit totius Mundi peccata. TUBARUM deniq; Festum in primum diem Mensis septimi incidebat, & procul dubio eum in finem institutum est, ut Israelitæ quasi excitarentur, quo sese ad celeberrima illa duo Festa, quæ in Mensem illum incidebant, præpararent: Videturque celebriore isthoc Sabbatho fuisse præfigurata prædicatio poenitentiae *Johannis Baptistæ*. Præter hæc verò jam enumerata Festa, Sacer Codex mentionem quoque facit Festi NEOMENIARUM seu NOVILUNIORUM, quod in memoriam creatæ lucis institutum, primo cujuslibet Mensis die celebrabatur, taciteque cultores admonebat, ut Menses soli DEO temporum solertissimo gubernatori sacros esse vellent. His annumerari quoque possunt Feriæ CONCEPTIVÆ h.e. non mandatae à DEO expresso verbo, sed ab Ecclesia in gloriam & honorem summi Numinis ac ad retinendam acceptorum beneficiorum memoriam receptæ, approbatæ. In horum decuriam translabitur Dies ille, quem solennibus diebus publico consensu adscriptum, *In memoriam triumphi Judith de Holopherne Nabuchodonosaris*



no fariscopiarum Magistro reportati, Judæos quotannis summâ cum  
festivitate & lætitiâ celebrasse ex libro *Judith* colligere promptum est.  
Nec immerito huc refertur Festum PURIM s. SORTIUM dies, quos  
revertente anno XIV. & XV. Mensis Adar s. Februarii diebus perquam  
solenni honore simul & magno cum gaudio celebrandos esse decreverat  
*Mardocheus* in memoriam ultionis atque supplicii, quod Judæi ignomi-  
niosissimæ crucis morti addicti & destinati, machinatione in hostium  
caput versâ, ac proindè luctu in gaudium mutato, de *Hamam* & omnibus  
adversariis suis mirâ fortunæ alternantis vicissitudine sumserant. Multò  
minùs ex horum Festorum numero excludi poterit. Festum E N C E-  
NIORUM, quod *Judas Maccobæus* accedente Ecclesiæ totius consensu  
& approbatione in memoriam instaurati templi Jerosolymitani & libe-  
rationis ex Tyrannico dominio *Antiochi Regis* per dies octo Mensis Chaf-  
leu sive Novembris pio consilio instituisse traditur. Quod si igitur in Ec-  
clesia V. Testamenti Deo sic volente, jubente ac mandante, certi dies elec-  
ti fuerant, in quibus præ cæteris præcipuorû DEI beneficiorum recor-  
datio solemniter, publicè & annuatim institueretur: quidni laudabili-  
ter & utiliter in N. Testamento idem posset fieri? Etsi enim Christiani  
in novo Fœdere non sunt obligati ad Judaicorum Festorum observa-  
tionem, nullumque hac de re extet Mandatum; laudabili tamen & per-  
utili more atque consuetudine in Ecclesiam N. Testamenti introdu-  
ctum est, ut certi & anniversarii *dies Festi* extarent, in quibus præcipua  
Religionis Christianæ capita Populo proponerentur, inculcarenturq;:  
Cumque omnia, ex sententia D. Pauli Apostoli, decenter & ordine ge-  
renda sint in Ecclesiâ: jure ac merito sub quorundam dierum quiete,  
â nostris laboribus feriabimur, & recordatione Vitæ sanctorum seriâ  
maximeque operum divinorum meditatione mentes nostras ad pieta-  
tem exercebimus. Et quidem hos ipsos dies celebramus ac observamus  
non ex necessitate mandati, cultus & meriti, sed ex libertate Christia-  
nâ, ordinis, decori & disciplinæ gratia omni superstitione remota. An-  
niversarii enim illi dies festi ac iacrae celebritates decoro ordini & Chri-  
stianæ Societatis paci retinendæ, experientiâ teste, inserviunt multum.  
Meritò autem hic superstitionis insinulamur cum Sabbathariis illos,  
qui Canones certos de termino Paschali constituunt, & leges ferunt de  
diebus festis contra mentem Apostoli ad Coloss. 2. Apostolorumque,  
ac Sanctorum Martyrum dies, quos iidem aliis sanctiores somniant,  
tum servari tum omitti etiam posse, atque *ἀδιάφορον* esse statuimus

Sola



Sola namque persuasit Idolomania, ut instituerentur, quæ Latroni etiam cuidam ex opinione falsa tanquam Martyri festum paravit apud, Severum Sulpitium. lib. de Vita Martini Episcopi. Erat enim, inquit, haud longè ab Oppido proximus Monasterii locus, quem falsa hominum opinio, velut conscriptus ibi Martyribus sacraverat. Nam & Altare ibi à superioribus Episcopis constitutum habebatur. Sed Martinus non temerè adhibens incertis fidem, ab his qui majores natu erant Presbyteris, vel Clericis flagitabat sibi nomen Martyris vel tempora passionis ostendi, grandi se scrupulo permoveri, quod nihil certi constans sibi majorum memoria tradidisset. Cum aliquandiu ergò à loco abstinuisset, nec derogans religioni, quia incertus erat; nec auctoritatem suam vulgè accommodans, ne superstitio convalesceret: quodam die paucis secum adhibitis fratribus ad locum pergit. Deinde super sepulchrum ipsum astans, oravit ad Dominum, ut, quis esset vel cujus meriti sepultus, ostenderet. Tum conversus ad levam, vidit propè adsistere umbram sordidam, truem. Imperat, nomen meritumque ut loqueretur. Nomen edidit, de crimine confitetur, Latronem se fuisse, ob scelera percussum, vulgi errore celebratum, sibi nihil cum Martyribus esse commune; cum illos gloria se pœna retineret. Mirum in modum vocem loquentis qui aderant audiebant, personam tamen non videbant. Tum Martinus, quid vidisset, exposuit, iussitque ex eo loco Altare, quod ibi fuerat, submoveri, atque ita Populum superstitionis illius absolvit errore. Haecenus ille. Si jam recensere vellem omnes festivitates, quas etiam habuit, quæ variarum superstitionum & impietatum laqueis constricta tenebatur Gentilitas, κακοζήλῖα quædam institutas, quasque, teste Gregorio Nisseno, Gregorius Thaumaturgus in festa Sanctorum Martyrum mutavit: pro Pandiis enim & Diasiis & Dionysiis h. e. Jovis Liberique patris solemnitatibus, Petro, Paulo, Thomæ, Sergio, Marcello, Leontio, Antonino, Mauritio, aliisque sanctis Martyribus, solemnitates populari epulo peragi statuit, referente Theodoro de Evangelicæ veritatis cognitione lib. 8. paginae Programmati scribendo dicatæ vix sufficerent. Omnes autem Feriæ publicæ hætenus ab Ecclesiâ Christiane receptæ commodè ad tres Classes referri poterunt. Aliæ quippe dicuntur *Stativæ*, quæ & statæ & anniversariæ nominari poterunt; quotannis enim hæ constitutis diebus atq; mensibus recurrunt, & in fastis statis observationibus annotatæ fuerunt, ut sunt apud nos omnia Festa immobilia, & apud Romanos erant Agonalia, Carmentalia, Palilia, &c. *Aliæ Conceptivæ*, quæ à Pontif: aut eo permitte à Sacerdotibus in dies certos aut etiam incertos annis singulis



concepiebantur ; ad quam classem Festa spectant nostra mobilia , Romanorum vero Feriæ Latinae, Sementinae, Compitalia. Aliæ denique Imperativæ quas pro arbitrio Consules, aut Prætores ob victoriæ nuntium aut salutem Principis apud Romanos indicebant, & tales sunt nostræ dies Poenitentianeles, itemque illæ, quibus DEO vel pro obtenta pace vel alio nobis concesso beneficio gratias publicè agimus.

Cum itaq; & ille Dies festus anniversarius iterum illuxerit, quâ illustriû Angelorum renovare memoriam, suscepta & solennis Religio instituit: omninò nostrarum partium erit, qui non titulo solum Christianorum saluari, verum etiam reipsa Christiani esse volumus, ut Doctrinam hanc quam diligentius consideremus, perpendamus, meditemur. Et sane multum imò plurimum refert, ut pii quovis tempore de tutelâ ac præsidio Sanctissimorum illorum Spirituum cogitent. Hi enim sunt Heroes, hi sunt Milites illi fortissimi, qui nocte dieque nostri causâ excubias agunt: Hi nostri custodes sunt, quorum præsidio adversus malos spiritus, incommoda corpori ac animæ importare, ac in capita nostra mala quæque machinari studentes, tegimur & munimur, hos illi oppugnant, hos abigunt, arcent, propulsant & in fugam convertunt. Hanc veritatem Pagani in tenebris attrectarunt non nihil; nos qui CHRISTO Imperatori Sacramentum diximus, luce cœlestis doctrinæ illustrati plenius cognoscimus & amplectimur religiosius. Ita enim fidelibus singulis per divinum Vatem DEUS spondet: *Non accidet tibi malum, neque plaga appropinquabit tabernaculo tuo, quoniam Angelus suus mandabit de te, ut insodiant te in omnibus viis tuis in manibus portabunt te, ne forte ad lapidem impingat pes tuus.* Admirandum sanè beneficium, quod omnem intelligentiam longè superat, nedum ullius ornatu dicendi, aut copiâ satis explicari queat. Ingeminemus potius altissimâ voce cum s. Bernhardo. *Domine, quid est Homo quod reputas eum? Mittis illi unigenitum tuum, immittis Spiritum Sanctum tuum, promittis vultum tuum, & nequid valet in cœlestibus ab opere sollicitudinis, beatos illos Spiritus mittis in Ministerium nostrum.* Novimus equidem, sacerrimos hosce Spiritus non tantum ad electorum sed & ipsius DEI ministerium esse ordinatos & destinatos, uti hoc ipsum tum ex Vate Daniele cap. 7. tum ex Epist. ad Hebræos cap. 1. patet, quorum ille millia millium ipsi DEO ministrare, & decies centena millia assistere: hic vero in Ministerium emitti propter eos, qui erunt salutis hæredes pronunciant. Verum ille immortalis hujus Universitatis Parens, qui

habet



habet omnia, qui solus est, qui complet omnia, cujus infinita est potentia, qui ipsa est perfectio, ipsa absolutio, nullaq; aliena indiget opera, non cum in finem obsequio suorum spirituum utitur, quod ipse minis sufficiat gubernando hoc imperio, sed ut ipsi serviant in singularibus ejus Mandatis recipiendis, iisdemq; efficiendis, prout hoc ipsum Num. 22. satis clarum est, ubi Angelus DEI emittitur, ut Balaami Asinam prohibeat. Ita etiam ablegatur Angelus ad Uxorem sterilem Manues Samsonis futuram matrem, ut ipsi filii conceptionem annunciet. A DEO item amandatur Angelus Gabriel ad Zachariam, ut ipsi annunciet conceptionem & parituram Uxorem suam Elisabetham Joannem Baptistam; nec non ad Virginem Mariam significatum ipsi, se Matrem Salvatoris generis humani facturam. Accedit & hoc officium, ut Creatorem suum æternum ac sine intermissione celebrent, hymnum illum sacro sanctæ & individuae Trinitati consecratum elata voce cantando: *Sanctus, Sanctus, Sanctus Dominus DEUS Zebaoth, plena est omnis terra gloria ejus.* Et tali modo exequuntur id, quod regiùs Psalter Psal. 148. jubet: *Laudate DEUM omnes Angeli, laudate eam omnes Virtutes ejus.* Hoc modo expediunt, quod autor Epistolæ ad Hebræos præcipit. *Et adorant CHRISTUM omnes Angeli.* Ad nostram imprimis eos utilitatem adhibet DEUS, uti Epistola jam allegata ad Hebræos cap: 1. testatur, quando; *Nonne omnes sunt administratorii Spiritus, in ministerium missi propter eos, qui hereditatem capiunt salutis?* Possem hæc omnia, vel sexcentis Sacræ Scripturæ locis probare, nec exempla, quibus hæc clariora evadunt, deficiunt. Angeli enim leguntur custodia munivisse ædes Lothi, quem etiam, manu ejus apprehensâ, deducunt ex flammis ultricibus, cum nimis diu commoraretur. Quanto studio & cura Israelitarum liberationem ex Ægypto promoverint, ac quantâ vigalantiâ ipsis adfuerint in toto peregrinationis tempore, Vir DEI Moyses perspicuè satis demonstrat. Annon Prophetam Eliam Angelus Domini in deserto profugum & mori expetentem, aquâ & pane nutrit? Annon Elisæum contra Syrios defendit? Annon Viros tres in ardentissimo camini Babylo-nici igne Angelû mirabiliter custodivisse memorat Daniel? Annon Angelus pro Rege Persarum cû Diabolo est præliatus? Taceo quomodo Magi ab Angelo admoniti, ne Hierosolymâ ad Herodê sese iterû conferrent, magnum vitæ discrimen declinaverint: quomodo Apostolus Petrus ex carcere & vinculis Regis Herodis eductus. Prætereo multa alia exempla, quibus Sacer Codex est refertus, cû ea adducere necessarium non habea-



**habeamus; Ipsi namque quotidie experimur fidelissimam horum San-**  
**ctissimorum Spirituum custodiam atque tutelam.** An autem singulis  
 hominibus singuli Angeli sint custodes adjuncti, an plures? à curiosis quæ-  
 situm hætenus Priori quæstionis parti suffragatur **CHRISTUS** veritas  
 ipsa, ubi apud Matt. Cap. 18. dicit de parvulis credentibus in ipsum,  
*quod Angeli eorum in cælis perpetuo aspiciant faciem Patris sui:* Et Luc. in  
 Act c. 12. narrat, Apostulum Petrum ex Herodis Tyranni vinculis per An-  
 gelum liberatum esse. Quo respexit etiam *Origenes* quando, *Adest,* inquit,  
*unicuique nostrum etiam minimus, qui sunt in Ecclesia DEI, Angelus bonus, Ange-*  
*lus Domini, qui regat, qui moneat, qui gubernet, qui pro actibus nostris corri-*  
*gendis & miserationibus exposcendus quotidie videat faciem Patris, qui in cæ-*  
*lis est.* Et *Beatus Hieronymus* inter cætera hæc habet: *Magna dignitas ani-*  
*marum, ut unaquæque habeat ab ortu nativitatis in sui custodiam Angelum de-*  
*legatum.* His etiam assentitur *Chrysost.* hæc subindè multis in locis re-  
 petens: *Unusquisque credentium Angelum habet.* Posteriori parti adstipu-  
 latur historia Jacobi Patriarchæ, cui binæ angelorum turmæ apparent  
 Gen. 31. Et *Eilifæi* Prophetæ, quem flammeorum equitum & curruum exercitus  
 adversus Syriorum potentiam tuentur. Lazari item, cujus anima non ab Angelo  
 sed Angelis deportatur in Abrahamæ sinum. Etiam si autem hæc allata testimonia  
 inter se dissidere videntur, conciliari tamen hac ratione possunt, ut dicta prio-  
 ri quæstionis parti subscribentia suum cuique Angelum à **DEO** attributum  
 & destinatum esse *Ordinarie* affirmant; ad eum autem ordinem Deum sese non  
 ita alligare, quin veluti extra morem consuetum plures nonnunquam Angelos  
 uni homini, libera sua voluntate adjungat, dicta cum posteriori facientia as-  
 severent. Ne igitur quisque, *Cives Academici,* Angelos præsentis & auxilantes,  
 atque adeò paratos pro nobis pugnare, impietate sua repellat, sedulo prospici-  
 endum erit. Ut enim foetentia atque foeda ac impura cuncta fugiant apiculæ;  
 ita etiam purissimi hi Spiritus abscedere ab illis solent, qui luxu se & libidine  
 contaminant; qui crapulam, lasciviam in dictis & factis proterviam omnem  
 consecretantur; qui officii sui immemores inerti otio annos transmittunt. Illis  
 autem repulsis in locum eorum malos Angelos succedere, qui callidissimi saga-  
 cissimique sunt ad nocendum & miseros Mortales in exitium perducendum, ne-  
 mo sanæ mentis inficiari poterit. Si itaque vera Religio nobis Cordi atque curæ  
 est, hoc ageendum erit, ut quotidie filiali observantia cælestem Patrem nostrum  
 veneremur, & pro Angelico comitatu nobis indulgendo supplicibus precibus  
 oremus, spe ista indubitata, nos exauditum iri, ac securos fore, tum in Ecclesia,  
 ne à Tyrannis vel Hereticis opprimamur aut pessundemur: tum in Republicâ,  
 ne illa intestinis vel externis hostibus turbetur aut pereat: denique & in ipsâ  
 singulorum Oeconomîâ, ne vel igne vel aliis cladibus consumatur, aut rerum ad-  
 victum aut amictum necessariorum detrimentosam cladem subeat. Tu, **DEUS,**  
 annue votis. P. P. Rostochii ipso Michaeli sacro die, Anno M. DC. LXXI.

sub Sigillo Rectoratus.

